

四庫全書

集部

欽定四庫全書

武夷新集卷十

宋 楊億 撰

墓誌二 三首

宋故推忠協謀佐理功臣光祿大夫尚書右僕  
射兼門下侍郎同中書門下平章事監修國  
史上柱國隴西郡開國公食邑三千八百戶  
食實封一千二百戶贈太尉中書令諡曰文  
靖李公墓誌銘

景德元年秋七月乙酉大丞相僕射隴西公早朝至待  
漏舍不俟鑰出而歸疾故也粵翌日車駕幸其第親至  
卧內存撫甚厚賜白金三百斤既還宮以不起聞上又  
臨哭出涕初公之疾也中人太醫絡繹旁午於道殆公  
之薨也千乘萬騎一日再幸其居國殞宗臣帝失元輔  
都城為之罷市工女以之寢機同體既虧實太上之深  
戚斯文將喪顧天下而誰宗嗚呼哀哉真古之遺愛也  
公諱沆字太初其先趙郡人廣武君之後也策書所載

世德茂焉秦陵令累贈侍中豐追封號國太夫人滕氏  
曾祖父母也洛州團練判官累贈中書令滔追封魯國  
太夫人苗氏王父母也侍御史累贈尚書令炳追封陳  
國太夫人周氏考妣也公韻宇宏廓襟靈冲粹特資異  
稟卓然不羣甫及成童性靡好弄逮於就傳言必有章  
七歲能屬文十歲通五經大義服膺素業既冠而大成  
比肩諸生命鄉而高薦時春官氏方虛甲科以待屬丁  
先府君之憂自大梁而抵羣舒幾二千里見星泣血哀

感道塗食幣倚廬毀深藥棘先府君歷佐使府及剖郡  
符狗公減私輕財好施以經遺子市義於人暨啓手之  
辰無兼金之蓄公承清白之訓持窘絕之家有原憲貧  
病之憂茂張仲孝友之德太平興國五年舉進士得高  
第解褐將作監丞通判潭州郊祀遷太子右贊善大夫  
八年歸朝為著作郎當是時也天子方端委穆清詳求  
茂異崇建冊府養育人材公之蒞長沙也椒蘭之德在  
人金玉之音盈耳輜軒密啓外臺陟狀稔熟於上聽宣

塞於公議中謝日太宗命中貴人送丞相府試文一通以本官直史館賜五品服雍熙中今工部尚書王公化基任左拾遺上封公車大言自薦太宗謂執政曰李沆宋湜皆佳士也可並試之明日並命為右補闕知制誥公之位任在二公之次上特令公首冠焉又賜錢百萬天子知公貧多權錢富家出倍稱之息又別賜三十萬俾償之端拱初遷職方員外郎掌誥如故來年受詔與今學士承旨禮部尚書宋公白同知貢舉是時天子始命

復舊制委有司貢部翕然有得人之譽未幾召入翰林  
充學士賜金紫又奉詔與今丞相上谷公同掌選部澄  
汰流品旌別淑慝清通簡要時譽歸之公之在內署也  
或乙夜觀書之餘備前席受釐之問風規醞藉占對嫻  
雅弼違獻可上多沃心稱善舉能言皆有味天子知其  
才可以緝熙帝載察其德可以鎮厚風俗乃有意於大  
用也淳化二年拜給事中叅知政事是時天子方循名  
實以考百揆謹吏事而責三公公勵翼一心將明庶政

水潦僅止閭閻息愁歎之聲名器有倫措紳絕僥倖之  
路彌縫闕職汙至小康俄罷政事以本官奉朝請雖坐  
策免時望彌重未幾丁太夫人憂柴毀過禮先是公疏  
戚同居功總百口昆弟致美家人忘貧賦祿雖優量入  
都盡及罷樞務復罹哀疚居喪盡禮送終竭力殆於食  
貧曾不屑慮優詔起復辭不得請俄以本官知昇州因  
奉璽書請對便坐天子留而不遣改命知河南府兼留  
守司事二周變風期月報政纔及滿歲召歸闕廷屬光



啓承華克固邦本疇咨羽翼輔導元良即以公為禮部  
侍郎兼太子賓客特詔賓護之職一用師傅之禮仍屈  
儲君之重先施下拜之儀公請見頓首辭不獲免皇上  
踐極拜戶部侍郎叅知政事未幾以本官平章事監修  
國史進位中書侍郎屬鳴鏑犯邊翠華薄伐居守之任  
根本斯繫關中圖籍委鄰侯以無疑東郊保釐非畢公  
之為比上親握武節躬御六師北涉大河駐蹕全魏勞  
軍而連營賈勇展義而編氓案堵班馬引去邊塵載清

無有南顧之憂克定一戎之業者繫公之力也公亦坐鎮京邑兼容獄市令行禁止不戮一人千門萬戶曾無吠犬及鑾輅凱旋謁見行在置酒幄殿奉觴上壽勞問優渥體貌尤異清中除道奉迎至尊同德一心光輔大政來年進位門下侍郎屬有事南郊加尚書右僕射餘如故公踐師長之秩處丞弼之地屬西北二鄙金革未息伐謀制勝實賴前籌調發均輸曾不暇給當宁靡寧於旰食宰府專職於憂邊公夙夜自公憔悴事國任重

責大智困神疲休澣在辰稀得出沐賸理微疹不敢寧  
居筋力前衰精爽坐竭岑江陵之盡瘁天子先憂張司  
空之云亡星文告變嗚呼享年五十有八詔輟視朝五  
日贈太尉中書令上又別次發哀羣臣奉慰追錄嗣子  
逮於周親乃至外姻諸甥常從給使咸被延賞之澤悉  
膺非次之命又特命昭宣使恩州團練使李公神福監  
視葬事太常考行謚曰文靖發引之日有司具鹵簿大  
鴻臚持節護喪即以今年五月庚申歸葬于河南府洛

陽縣賢相鄉積潤里從尚書令府君之塋禮也公積階  
至光祿大夫策勲上柱國三進爵為公真食至千二百  
戶功臣之號凡再加焉祿位寵名皆人臣之極也前娶  
清河張氏永興軍司馬忠輔之女生一子曰翁朝三女  
長適右諫議大夫薛映次適奉禮向傳正相國河內公  
之子也次數歲而夭及公之薨張夫人之所生無復存  
者今夫人沛國朱氏累封越國夫人故太常少卿致仕  
累贈工部侍郎洞之女嬪于台宰宜其室家作範中閨

啓封大國齊眉舉案禮極如賓晝哭帷堂痛深偕老生  
四子三皆早夭幼曰宗簡大理評事五女長適著作郎  
直史館王曾執喪過哀遇疾而逝次皆幼公三弟曰贊  
虞部員外郎知洛陽縣陳力就列負適時之才曰源太  
子中舍裕蠱亢宗真保家之主曰維戶部員外郎直集  
賢院文行第一見推朝倫克荷世家允為國器公風鑒  
融朗天性謹厚自結髮為學靡雜塵游雖燕居慎獨如  
臨賓祭視童無誑處閤周欺韋編屢絕不閱非聖之典

束帶未既不答嚴君之召先府君常語人曰此兒異日  
必至公輔知子之明蓋無媿矣及計偕續食發策決科  
引籍周行通直延閣水懷珠而川媚林養棟以材成繇  
是升右掖以司言入內庭而待詔五代已來文體一變  
至於雅語殊未復古公之書命也啓迪前訓潤色鴻業  
善為辭令長於除書考三代之質文取兩漢之標格使  
國朝謨訓與元和長慶同風者緊公之故也及叅貳政  
柄彌綸事典守正持重不務將迎出蒞瑣闥恪居官次

靖恭夙夜曾無澄撓尹正西洛茂宣愷悌之風調護東  
朝助成明良之德暨再掌鈞軸正位岩廊斟酌治體辨  
論官材人斯具瞻帝用親倚謀事補闕夜思晝行納誨  
盡規有犯無隱深識大體務行故事終年公府未嘗案  
吏退食私第靡有謝賓加以慎默寡言質直無矯百執  
延見多虛往而實歸兩府論議必守經而據古將順歸  
美而不喜詭隨夕惕補過而深懲滿假茲所謂皇家之  
柱石神化之丹青也至如喜怒不形進退可度陟降畫

室尺寸靡差吐嘔車茵醉飽必恕賦祿雖厚奉身甚薄  
萬錢之入周急屢空數畝之居偪下已甚不問家事不  
恤人言疇昔交遊淡水之情無改平生恩德一飯之報  
不忘性絕玩好專聚圖籍孜孜繕寫躬自餽對崇奉內  
典洞曉真諦每燕居靜慮深念無生旁行四句堆案盈  
几雅善筆札特臻其妙嘗所著述遺藁頗多季弟維論  
次編聯成二十卷立言不朽其在茲乎諸弟等以某為  
相府舍人多歷年所欽奉全德飽聞緒言見徵銘篆之



詞以防陵谷之變某早在薦紳之末特蒙國士之知雖  
年輩相遠位貌非等更僕之論固嘗莫逆於心沈石之  
文庶幾傳信乎後是為實錄諒無媿焉銘曰

聖作物覩帝賚元輔如鼎三足猶天八柱翊宣大猷康  
濟庶務衮職有闕仲山是補顯允相國光弼大君謨明  
亮采師古經文道類矢直政無絲棼百工時乂九流洞  
分公德如風孰不霑靡公言如蘭人斯服媚大成典謨  
學探象繫嗚呼彼蒼胡不憇遺公心如秤重輕誠懸公

道猶龍鑽仰彌堅功熙帝載識窮化源哀哉哲人胡不  
永年它人蹄涔可以揭厲公陂萬頃涵泳無際它人塊  
垣殆見室家公塋數仞德音孔遐公掌大鈞平章百揆  
思職憂邊匪躬盡瘁哲人其萎二豎生沴挑萌臨喪禮  
優賙祿公輔大政高朗令終易名贈秩褒德顯庸十世  
猶宥九原啓封鹵簿賜葬都城輟春馬悲鳴兮車結轍  
弩矢驅兮班劍列靈輶駕兮祖奠徹銘旌飄兮楚挽咽  
伊人生之共盡兮唯大名兮不滅却之麓兮洛之涯泉

臺間兮隴樹微宿草短兮朝露晞蒼烟暝兮夕鳥飛苟  
逝者之可作兮非我公兮曷歸

宋故大中大夫行給事中上柱國臨汾郡開國  
侯食邑一千二百戶賜紫金魚袋平陽柴公  
墓誌銘

公諱成務字寶臣其先平陽人漢棘蒲侯之後也世亂  
流寓不常厥居公之遠祖占籍河朔積德有後宗派盛  
焉五代祖賡因官曹南遂家于濟陰郡大王父綱廬州

別駕王父胤隱居求志藏器不耀累贈太子右贊善大  
夫祖妣劉氏追封彭城縣太君烈考自牧舉進士乙科  
應聘戎閫晉末之亂奉武行德於河橋蹈危機畫奇策  
尊立漢室底定中原天步既清賞典不及逮周邦之啓  
始通閨籍踐歷臺省淹徊郎署終兵部員外郎而王父  
祖妣追榮錫命皆由兵部之故也自公之貴兵部累贈  
禮部侍郎妣丁氏追封譙縣太君錫羨流光斯不誣矣  
公風度夷雅襟靈冲粹始在孩稚迥如老成靡事塵游

不雜兒戲橫經就學昂昂有千里之資從賦千名籍籍致同人之譽每投誠執贄前達為之致恭秉筆屬文傾都以之傳寫春官宗伯常虛甲科以待之而公思值名公伸於知己乾德中禮部員外郎知制誥王公祐適典貢部公始就鄉舉即以公冠於諸生當時朝野聳得賢之議解褐宿州軍事推官秩滿為曹單觀察從事被所知之舉遷大理寺丞監潭州茶場筦推之利實佐於用度羨餘之績具載於簡書疇其幹蠱之才委以外計之

任改太常丞峽路轉運副使賜五品服拜監察御史知  
果州轉殿中知蘇州滿歲移充兩浙轉運使改戶部員  
外郎直史館賜服金紫除本曹郎中充三司戶部判官  
選為光祿少卿未幾充高麗國信使復命領京東轉運  
入為司封郎中知制誥遷左諫議大夫知河中府今上  
踐祚拜給事中知梓州歸朝受詔同修永熙實錄俄知  
揚州入判尚書刑部小吏犯法怒而笞之黥胥無賴伏  
闕自訴適有中旨薄責其狀公以為天子從官領秋曹

六卿之任扶吏被劾禁止朝謁亦何面目復據堂決事耶即上言解職以本官奉朝請未幾腠理生疾勿藥靡徵哲人其萎頽山興歎嗚呼公以景德元年六月某日考終于正寢享年七十有一公寢疾彌留方寸不亂口占遺奏以六歲孤兒為言上憫之特授太常寺奉禮郎賦以廩祿俾終喪紀即以某年某月某日奉公之靈柩歸葬于開封縣新里鄉汴南里小邊村汴南原舉前二夫人祔焉禮也公始娶趙氏故宗正少卿齊之女後娶

張氏今夫人李氏封贊皇縣君故水部員外郎峇之女也宜家之美內助居多德茂亢宗義敦偕老三娶令族晚有兒息年六十有六始得今奉禮焉二女長許適太常寺太祝張太初今戶部侍郎雍之愛子也次尚幼二弟曰成象舉進士終秘書省著作佐郎曰成文任三班奉職實公之保任也弟之子曰貞範將作監丞曰貞簡秘書省校書郎皆自公而成立焉公文行首出時名籍甚自濯纓筮仕束帶登朝佐幕從軍頗聞婉婉之畫剗



煩治劇蓋有飄飄之刃先朝以卿士惟月時惟古官位  
實象河行有鳴玉典掌尤重表著竝崇自唐以來目為  
散地思矯前失以振舊規乃選諸曹正郎有才望者十  
人並補少列而公首膺茲任羣議允歸至若辰韓之區  
是為君子之國世修職貢乃心本朝而尺詔頒恩輒軒  
遣使撫柔殊俗震疊皇靈自非專對之才或致君命之  
辱而公奉辭于役裔壤咸懷矧內史西臺專掌訓誥代  
言之選居第一流而公允是僉諧潤色鴻業前朝國書

藏在冊府論次大典厥惟難才而公肅奉擬倫裁成信  
史逮于出典劇郡必樹於風聲入奉內朝式瞻於儀表  
經筵學海河東之三篋盡通辯囿談叢稷下之千人皆  
伏多識前訓鑽之彌堅善與人交久而無改雅奉玄元  
之教妙達養生之旨深通醫砭之術屢獲蠲疴之効其  
風規醞藉學術該博亦足為儒林之丈人公朝之舊德  
矣某昔刊青簡嘗接緒言今志佳城無慙直筆庶幾傳  
信以永方來銘曰

濁河奔流羽蟲日化逝者如斯不舍晝夜新阡鬱起原  
隰龍鱗死而可贖人百其身嗚呼柴公名高鄉品給事  
左曹行將十稔享年從心考終正寢日月之吉龜筮叶  
從牛眠卜宅馬鬣增封九原宿草千古長松唯令名兮  
不滅與簡策兮無窮

宋故推誠翊戴同德功臣山南東道節度管内  
觀察處置橋道等使特進檢校太尉同中書  
門下平章事使持節襄州諸軍事行襄州刺

史判許州軍州事上柱國隴西郡開國公食  
邑一萬四百戶食實封三千二百戶贈中書

令諡曰忠武李公墓誌銘

景德元年冬天驕寇邊羽書狎至列城開壘冀方弗寧  
燿火幾照於郊畿敵騎將飲於河曲聖皇赫怒乃議親  
征六師戒嚴百神衛蹕且詔襄陽節度相國李公為駕  
前東面都排陣使元戎十乘實先啓行既至而軍聲震  
且戰而我渠殪清道迎謁案節前驅及天步底寧鑾輿

凱入又詔公以精甲萬騎留鎮澶淵粵二年春正月詔  
公入覲臨軒延見體貌非常置酒高會宴勞加等適終  
飲至之禮俄嬰腠理之疾太醫中貴相望於通莊翠華  
羽葆親至於甲第公力疾迎拜雪涕興言發於至誠感  
動人主既而中乾遘沴有加無瘳殆於旬時遂至沈劇  
汜二月癸未以不起聞皇上撫几興嗟臨喪出涕失左  
右之手奄喪於宗臣聞鼓輦之聲深思於賢帥播紳相  
弔里巷輟春桃李無言蓋仁愛之所結金石斯刻固風

烈之如生嗚呼哀哉真人之傑也已公諱繼隆字霸圖  
其先隴西成紀人至於因生命氏之由來世德家風之  
似續實出玄元之後蔚為仙李之宗族望重於山東譜  
牒藏於冊府非假一二而談也公之遠祖占籍上黨水  
深土厚代產偉人大王父諱直以高尚之姿不求人爵  
以蕃衍之慶大啓孫謀王父諱肇仕後唐為都壕寨使  
檢校司徒同光中討王都於中山會北戎赴援王師失  
律諸帥奔潰不任其恥獨率麾下力戰而歿烈考諱處

肅國初佐命功居第一歷宣徽南北院使樞密副使屬  
太祖皇帝再造區夏經營四方申命信臣討平亂略偏  
師一舉盡得荆山之地不煩血刃無犯秋毫版圖入於  
職方貢賦歸於宰旅大勲既集飛語乃生卒致投杼之  
疑且有傳車之召屬吏問狀恥於辯明左遷淄州刺史  
考終於治所焉太祖念翊贊之元功申追命之殊典特  
贈宣德軍節度使檢校太傅以公之貴累贈中書令追  
封幽王妣吳氏封齊國太夫人王父累贈尚書令祖妣

趙氏累封萊國太夫人皆以公之故也公識度沈粹風  
規醞藉山庭月角蓋有封侯之相蒼壁黃琮乃是禮天  
之寶耿介不羣倜儻自任涉獵經史博通大義馳騁騎  
射冠絕一時初先王昆仲三人友悌尤篤而先王以翹  
車應聘杖策從軍伸於已知不遑家食公始在孩稚即  
養於伯父作坊君殆總角成人出就外傳乃歸膝下以  
奉所生蓋閨門之中兒無常父者矣先王居宣猷之任  
公朝行延賞之澤以公補西頭供奉官及侍行淄川為



當塗者除其籍屬聖人之降生從母氏而入覲命復其秩留於京師俄丁先王憂見星而行悲感齊俗遠日之卜歸葬洛陽執喪過哀襄事盡禮時公始十有七歲矣既畢封樹復預朝請而當時用事者或先王有憾之人方微寵於明庭思樹怨於後嗣公之所厚為公危之公介然自持不以屑慮姑務德報且圖智免繇是靡事生產多恣弋獵持權者謂其非象賢也勿復忌之甫及勝冠之年深達屈身之略事親以孝睦族以仁沈浮當

時脫略細故識者知其遠大也開寶初送戍卒於中山  
中山帥孟玄詰命譙射堂公矢無虛發舉止嫻雅玄詰  
有知人之鑒謂公曰他日非吾所及也時隴蜀初平寇  
盜猶梗命公為果閬州監軍兼巡檢太夫人以公使于  
遠邇特鍾慈念擇先王之左右常從及故謹厚者俾輔  
翊之公曰兒之是行不須此輩必當有立無忝前人太  
夫人喜聞其言拊背以遣戾止踰月羣盜屏息巨猾就  
擒齊氓安堵椒蘭之德薰于鄰邦金玉之音聞于京輅

受代即路比屋遮號遺愛在人頌聲盈耳公以庭闈在  
念晨夜兼程驛輶奔馳劒機危險蘿葛蒙密岩谷深峭  
狹逕雨苔之滑喬林宿鳥之喧絕澗崩崖人馬俱墜比  
驛吏然燭而至引綆以登兩無所傷深踰百尺議者以  
公貴盛之未涯孝思之致感也會朝廷將舉樓船之師  
復金陵之地命公率卒三百戍于武崗式遏蠻貊以防  
外侮先是內地但給刀楯羣寇暴集僅及數千公督士  
力疾推鋒決死藥鏃貫臂神色自若賊不敢抗稍自引

退繇是勇敢之譽聞於闕庭及王師南征命公與石曦  
領偏師討平宜春郡捷書上聞吳人褫魄太祖始不以  
衆人遇之也當是時浮梁渡于長江靈旗指于南國內  
發七校日費千金資糧靡屨順流而下牙檣鐵軸敵境  
是虞太祖命公與宗人符共董其役公脩豫有素往來  
無滯編管斗粟不爽於軍需木牛流馬式彰於心計太  
祖奇其材力形於歎嗟乃命公案視壘垣督責戰具出  
驅使傳車無停輪入奏戎機膝恒前席甲戌紀歷知江

左之道消伏波論兵與漢皇而意合自王師南渡公往復其間常日馳五百里途中遇虎以一矢斃之又嘗械降將一人獻於闕下至項縣疾甚斬首以聞太祖謂其勇而有謀可任大事嘗于江中與吳人水戰伏弩忽發正中其額若神物保護終無所傷奮不顧身忠而能力始太祖以先王之捐館也頗深痛惜特優命數若追悔之無及嘉舊勲而不忘疇公之勤益懷遺烈問及孤幼形於軫惻因謂公曰侯平江東之日奉捷書而來時中

使近臣幾十數輩專伺獻功競圖受賞適有機事當奏  
京師公獨請行上益虛佇且言臺城危蹙之狀因云在  
途日忽大風晦暝此城陷之兆詰朝露版至太祖名謂  
之曰如汝料矣吳將廬絳者嘯聚亡敗衆且萬人盜庫  
兵拒王命詔公以偏師討之勢窮乞降縛送行在以功  
遷莊宅副使會雩祀西洛命公為御營前後巡檢使太  
宗踐祚拜六宅使河決近郡奉詔使塞如期訖役水復  
故道三年輿駕薄伐次于常山命公視師晉陽盡護諸

將因受詔與彰德軍節度使李漢瓊當一面之衝施九  
攻之術飛矢羽集而戰氣益酣左輪朱丹而鼓音不息  
扶其不勉奮以先登勇常冠軍退必殿後嘗為機石所  
中勢如疾霆旁觀震驚不挫毛髮俄而并土窮蹙面縛  
出降太宗因其兵鋒遂討幽薊命公與郭守文領期門  
之師當前茅之任與敵鬪于胡瞿河之南大挫其銳會  
戎人救至我師不利倉卒之際即議班旋車駕宵征諸  
將皆去唯公敦陣整旅長驅而歸引弓之民紛布左右

憚其嚴整不敢邀擊追及行在太宗悅之既還上都罪  
狀諸帥惟公與汾陽等數人不坐焉俄而獫狁犯邊命  
公護常山軍與崔翰等大破敵於徐河先是朝廷圖陣  
形規廟勝盡授紀律遥制便宜主帥遵行貴臣督視公  
獨陳應變之略不以新書從事違詔之罪誓獨當之果  
成茂勲天子嘉歎四年遷宮苑使媯州刺史六年護三  
交戍兵又受詔與潘美出代北破契丹靈丘縣大獲而  
歸明年護定州軍雍熙二年李繼遷叛於銀夏受詔與



田仁朗討之仁朗被讒下獄以公為環州團練使實代其任公以仁朗非罪屢上言救之果獲輕典及西師之罷出為高陽關監軍三年春王師北征諸將受律公隸曹彬麾下實為之前鋒鼓行深入屢敗賊衆矢中左股督戰不廢得契丹貴將一人元戎欲奏其事公力止羣議不敢貪功俄而傳潛米信兵敗衆遂大擾為賊所乘獨公全師而歸成列不亂既次易州賊騎候至公兵素整格鬪退之因受詔知定州兼兵馬鈐轄太宗知公忠

勇可貞我政改武州防禦使充侍衛馬軍都虞候賜號  
忠果雄勇功臣九月匈奴南侵命公為滄州部署率步  
騎一萬以赴之敵急擊河間劉廷讓求救于公不俟命  
而往次君子館敵伏兵發廷讓等先不之覺公力戰敗  
之殲戮無數會暮敵援兵至裨將桑贊等先遁我師遂  
潰公獨領百騎達於河間讒人構之謂其失脩詔徵赴  
闕送相府簿責之公條對明白即命復位因上軍政數  
事皆可其奏未幾授武州觀察使檢校太保總兵如故

端拱元年春遷洮州保順軍節度使充侍衛馬軍都指揮使出為定州都部署是歲匈奴八萬騎寇中山公之衆纔二萬內謁者傳詔俾堅壁以待之公謂諸將曰聞外之事吾得專之也往年河間為人所誤不即死者正謂今日耳護軍素繼忠壯其言躍馬從之大破敵于唐河追奔數十里俘馘以萬計是歲敵寇常山及邢洺諸郡皆城守不出而中山之民芻蕘無廢公又出奇兵薄西山以邀敵敵亦引避太宗賢之召歸謂曰唯爾盡力

於我每歲防秋即詣屯所淳化四年授邠州靜難軍節  
度使仍總兵柄時李繼遷叛渙河外交通夏臺綏州高  
文岷舉城効順西鄙騷然命公為河西行營都部署繼  
遷聞風逃于絕漠保忠就縛送於石州或請誅之公曰  
當獻於天子以繫鼓耳既而申宥罪之命契明主之心  
焉至道二年春繼遷劫我輜重于浦洛河二將敗衄命  
公為靈環十州都部署經略西事秋七月大發車騎十  
餘萬分五路以討賊遣公自靈州取東關鎮由赤檉苦

井路以赴之軍行乏水深以為慮即自橐駝路徑趨烏池聞丁罕慶州之軍與賊接戰倍道赴救解其長圍三路之兵皆後期不至賊黨遠遯遂謀旋師尚以不赴靈州慮違詔旨遣其弟繼和奉表待罪太宗深加慰勉屬饋糧朔方命公由瀚海路率師護送公請自古原州涉蔚茹河為便衆或非之公確論其事又遣繼和入奏繼和亦博達有謀極言其利太宗聽之屬漕運之司飛輓未集遂案甲休士持重養勇賊將史訛遇者頗擾內屬

率兵擊敗之俘獲萬計士氣益震叛羌悉歸三年果由  
古原州路入援靈武遂城廢壘是為鎮我軍控夏人之  
咽喉為諸夏之扞蔽守禦之固至今賴焉自靈武之言  
歸聞永熙之厭代亟陳封奏求覲天庭改授陳州鎮安  
軍節度使檢校太傅總兵如故五月來朝上以公累朝  
舊臣地居元舅周旋二紀勤勞王家將欲增其寵名不  
敢煩於戎旅詔如同中書門下平章事歸鎮旬服偃息  
以作藩正位中台雍容而論道俯接天邑益蒙福於京

師並建戎藩用夾輔於王室屬太宗因山卜宅同軌戒期執圭來朝攀髯號慕俄丁齊國太夫人憂居喪盡哀幾於滅性明詔起復固讓莫從三年以誕聖之辰修上壽之禮郊勞餞飲寵數並優宴見諮詢嘉言罔伏五年郊祀進位檢校太尉六年北戎敗我師於望都公感憤載懷明發不寐上獎其誠節特詔歸朝清宴延登策慮幅臆公車請行封章疊委上優寵耆德不欲重煩但璽書垂褒便坐加禮而已俄授公山南東道節度使未幾

授詔判許州實由公乃心本朝忍違京輔遙領峴首式  
綏三楚之人卧理壁田且增九鼎之重遽以明德皇太  
后大漸詔入省之屬玄寢之有期復巾車而肆覲俄而  
北方之強舉國來寇邊城震駭羽檄交馳兩河之人旦  
暮延頸以俟六龍之御也公懇求扈從以扞牧圉上亦  
傾心委賴動靜諮訪公忠誠感發規猷宏遠公家之事  
知無不為帷幄之籌言皆可復及先驅禦侮受命忘家  
臨敵誓師人百其勇敢騎奄至不介馬而徑馳我武既



揚須破敵而會食大殲強寇克振天聲保界洪河申嚴  
戎政輕裘緩帶奉迎乘輿醕酒椎牛宴犒衛士上天眷  
命異域請和邊塵載清帝車來復加地進律實居羣后  
之先繼好息民式開萬世之利詔加開府儀同三司增  
邑千戶未及拜命遘茲沈疴適覩承平奄歸窀穸嗚呼  
享年五十有六詔廢朝五日贈中書令上特為制服發  
哀羣臣奉命入內內侍副都知西京作坊副使張公  
景宗監護葬事又命殿頭高品石廷福召名德僧就其

第作佛事四十九日而罷太常考行謚曰忠武發引之日有司具鼓吹鹵簿大鴻臚持節護喪即以今年十二月庚子歸葬于河南府河南縣偏橋村之先塋舉洪農郡夫人楊氏祔焉禮也公二紀宿衛四換節旄累階至開府策勲上柱國進爵為公真食至三千五百戶功臣之號凡三加焉祿位官榮皆人臣之極矣公前娶洪農楊氏即保靜軍節度使贈侍中光美之女也繼室天水閻氏封涼國夫人三子長曰昭吉次曰昭文皆任供奉

官先公而逝季曰昭慶今任洛苑副使四女長及笄而  
亡次適內殿崇班曹玪亦逝矣其二皆幼兩弟仲曰繼  
恂任洛苑使順州刺史不幸短命前公而歿有子曰昭  
遜以公之故特授內殿崇班季曰繼和任西頭閤門使  
平州刺史智略輻湊磊落不羣負文武之才以功名自  
任公友愛尤異深所推獎嘗謂之曰吾門之不墜者緊  
爾是賴自罷兵歸鎮因手筆唐李勣遺戒授之且曰吾  
不復預家事矣啓手之日依而行之及公之被病繼和

適受任并門力疾封章忍死以待飛駟而至相見甚歡  
談笑移晷方寸不亂比更衣而就舍即瞑目以歸全其  
器量也如此長姊適故洛苑副使郭守璘恭惟明德皇  
太后沙麓啓祥塗山叶慶作合先帝正位內朝光輔大  
君居尊長樂播德彤管升祔闕宮實公之元妹也次妹  
適故主客員外郎直集賢院范貽孫從父兄曰繼凝任  
樞密直學士未及大用而亡曰繼昭終於殿直二兄之  
子曰昭度內殿崇班曰承信供奉官皆由公之故也公

器宇宏廓風鑒融朗敦閱詩禮博通義府跌宕文史多  
識前言寤寐經綸善談名理為將威重御衆嚴整在貴  
思降人得其歡心撫下有恩士致其死力習知邊事練  
達武經臨難忘軀無厭於金革盡瘁事國竭力於股肱  
交遊之情歲寒而勿改行旅之際險易之不爭嘗奉詔  
書護塞河決日暮涉水讓舟於梁迥公與竇神寶乘單  
舸而渡溺於中流得大桑樹依之獲免及迥以舟迎夜  
半至岸比旦視之樹已沒矣其損已先人有如此者公

臨事有謀當機無滯岐溝之役適有詔部分諸軍隸於  
列郡公遽令錄其詔書後旬餘有亡卒數萬人集于中  
山不知所嚮公即以詔書諭之各給要券俾歸所部其  
深識制變有如此者公為國遠慮獻言盡規先嘗詔廢  
夏州公以為賊遷根本之地不可棄也又言銀夏南山  
中宜增置堡戍以扼其衝且保鄯蕃族而斷賊之糧道  
當時雖不用其策而識者韙之至於宿衛鈞陳握兵蘭  
錡周廬夜直太上有高枕之安戎壁親巡軍中無兒戲

之謂連守兩鎮密邇王畿化行若神明民愛如父母在  
宛丘日屬水潦暴集舊防壞決吏民奔潰蓋無聊生公  
獨守危堤精意懇禱衝波稍却一郡獲全率身捍患人  
受其賜性敦儉約不務華侈勤接士類雅好清言多聚  
羣書僅餘萬卷退食於公手自刊校喜讀春秋躬親繕  
寫筆札之麗自成一家博物多能動臻輿賾金絲誤曲  
周郎之顧乃迴駕驥同羣伯樂之鑒殊妙然而感激家  
世慷慨勲名嘗語弟繼和曰我異日當馬革裹屍正得

死所耳慎無厚葬期於速化既以彰盡忠之節亦以見  
達命之言在北邊日嘗奉詔廢威虜軍公上言以亭鄣  
之設不可徹備汔今賴之又累奉手疏乞固守靈州至  
於陷沒深以為恨此又城郢之英規禦戎之長筭也公  
勞謙自處兢持尤甚踐台宰之位也而與牀好讓慕考  
父之益恭立方面之勲也而坐樹無言同之側之不伐  
冠通侯之籍也而卑以自牧靡恃刑馬之盟居外族之  
親也乃貴而能貧謹守濯龍之戒宜其陟降帝右屏翰



王國出藩入輔生榮死哀清廟藏功鄴侯已居於第一  
未央畫像霍氏當期乎不名茲所謂皇家之畫臣人倫  
之全德也已愛弟等以某嘗學舊史從事斯文見徵篆  
刻之辭以防陵谷之變牢讓不獲謹為之銘銘曰

哲王建官仰鑒懸象紫微端門實列貴相文昌法宮乃  
有上將唯公踐之令問令望國之大事時惟五兵入董  
藩衛朕師不驚出總戎律亂略以清唯公尸之七德以  
貞二矛重弓高牙長戟琯戈淑旂屏我王國弩矢前驅

列鼎而食殊鄰不庭拊劔太息黼黻公衮山玄陸離赤  
舄几几貂冠蟬綏晝日三接宴見疇咨啟沃忠藎行無  
越思中山之師轍亂旗靡抗章請行投袂而起帝嘉舊  
勲慮其勞止盱食咨嗟璽書褒美控弦之騎飲馬于河  
鑾輅薄伐戰功居多時龍駐蹕天驕請和宣室飲至朔  
陲止戈帝居穆清體貌尤異中外式瞻安危注意事君  
致身憂國盡瘁嗚呼彼蒼胡不憇遺心領襄漢鎮茲壁  
田河潤九里民戴二天邑廣千乘祿踰萬錢樂只君子

胡不永年歲將暮兮寒風冽天皚皚兮飛密雪總帳儼  
兮猶懸靈輅隱兮進轍路悠遠兮野蒼茫歸夜臺兮從  
先王英魂邈兮騎箕尾忠功諱兮書太常泉扃閒兮宿  
草荒人生共盡兮吁可傷唯勲名之不滅兮等維嵩之  
峻極與洛水而靈長

武夷新集卷十

欽定四庫全書

集部

武夷新集卷十二

詳校官監察御史<sub>臣</sub>李陽樞

檢討<sub>臣</sub>何思鈞覆勘

總校官中書<sub>臣</sub>朱 鈐

校對官中書<sub>臣</sub>葉 楚

謄錄監生<sub>臣</sub>左熙世

謄錄監生<sub>臣</sub>任 鑑

欽定四庫全書

武夷新集卷十一

宋 楊億 撰

墓誌三 三首

宋故推忠協謀佐理功臣金紫光祿大夫行尚  
書吏部侍郎同中書門下平章事監修國史  
上柱國太原郡開國公食邑二千戶食實封  
四百戶贈太傅中書令諡曰文簡畢公墓誌  
銘

景德二年十月乙酉上御崇政殿丞相太原公早朝方  
候對於殿廬中與同列議所以條奏之事侃侃自若俄  
頃風眩暴作不能入謁上亟令太醫切脈餌以良藥遣  
中貴人絡繹致問良久疾甚殆不知人事上不俟駕躬自  
臨視肩舁歸第即日以不起聞上又親至其居臨哭之  
慟賜白金三百斤詔廢朝五日冊贈太傅中書令君臣  
之際斯為至矣哀榮之數無以加矣公諱士安字舜舉  
其先文王之昭功參於並建魏萬之後兆啓於大名錫

美流光世德彌劬衣冠閥閱史策相沿蓋為海內之名  
宗無愧山東之著姓公之遠祖占籍於代郡之鴈門以  
財力雄邊敦尚氣節以義方訓子蘊積慶靈至公之曾  
王父宗昱以州里推賢孝廉中選仕至雲州雲中令王  
父球位周充量仕不越鄉終本州別駕烈考又林以廊  
廟之姿屈於州縣以清白之訓遺於子孫終澶州觀城  
令達公之光輔大政若將登庸緝熙庶工平章百揆天  
子嘉同德之美尊獎於宰司舉追命之典褒崇於先正

乃詔有司贈公大王父為太子太保曾祖母吳氏追封  
鄧國太夫人王父太子太傅祖母史氏韓國太夫人烈  
考太子太師妣樂氏代國太夫人繼母祝氏鄧國太夫  
人盛德之後垂裕乎百世自天之澤光被於九原蕃衍  
之祥斯不誣矣公器宇宏廓風規爽邁爰自稚齒逮於  
成人介然不羣卓爾有立橫經鄉校拳拳服膺視膳庭  
闈烝烝就養公始在襁褓即失所生既罹憫凶鞠於祖  
母先太師繼室以劉氏祝氏歷事之率禮無違因心不



匱純孝之德士類攸稱勝冠之年纏憂曷怙几筵號慕  
藥棘盡哀既而閱先君手澤之遺文披奕世家藏之羣  
籍念立身揚名之訓思切磋博習之規而澶淵近畿逢  
掖蓋寡交遊所及孤陋是虞且聞鄭之圃田雅多君子  
因奉祝夫人徙居焉乃得今楊徵君璞工部韓侍郎丕  
及故光祿劉少卿錫博約浸潤遂通百家之言直諒多  
聞是為三益之友歲祀永久至業大成從賦春官時名  
籍甚乾德中禮部員外郎知制誥王公祐以名德掌貢

部乃擢公上第焉。邠帥楊廷璋備壁馬之聘，延置幕府，贊樽俎之畫，允為嘉賓。伸於已知，盡心所事，俯及二毛之歲，始霑一命之榮。除濟州軍事推官，時所親李公謙浦適牧是郡，筦榷之利，俾公專掌。歲致餘羨，民用胥悅。太祖聞其名，徵赴闕，面授兗州觀察推官。太平興國初，遷大理寺丞，兼掌河運方船之粟，轉漕攸資。九年之儲，廩庾斯實。屬吳越王修來朝之禮，獻益地之圖。海隅蒼生初被皇化，慎東良吏撫綏遠民，即以公知臨海郡事。

就遷太子左贊善大夫江東諸州鄱陽為大地征甚厚  
戶籍尤富非有濟時周物之用撥煩治劇之才臨於是  
邦鮮不敗事公自台徙饒踰年報政職務修舉吏民便  
之改殿中丞歸朝為監察御史受詔知乾州公以母夫人  
在喜懼之年有羸老之疾咸秦之地驛置尤賒扶侍之  
官登頓良苦因上言求督汝墳公田以奉甘旨官閑務  
簡遂其所好家貧俸薄不以嬰懷屬太宗皇帝崇建戚  
藩夾輔王室精擇僚佐翊贊親賢即以公為左拾遺冀

王府記室參軍侍從平臺從容朱邸成碣館好賢之美  
贊東平樂善之風至於曳裾王門仙姿冠玉抽毫客右  
藻思凌雲獨步一時覓出羣萃藉田畢就轉考功員外  
郎未幾以本官知制誥藩王以借留為請天子不之許  
也再歲召入翰林為學士公上言禰廟二名有所嫌避  
明詔敦諭不容辭職天子嘉得賢之美議者蔚知禮之  
稱又受詔與蘇易簡同知貢舉是歲郡國貢士以二萬  
數奏名亦數千人至公無私羣議歸美會郊祀拜主客

郎中學士如故俄授右諫議大夫知潁州屬淫雨降灾  
嘉穀不稔公乞開公廩以振乏絕望賜田租以惠疲瘵  
帝俞其請民實受賜會今上尹正京府寵綏神州驛召  
公為開封府判官未幾肇啓儲闈並設官屬申命公兼  
太子右庶子遷給事中領職如故屬大明繼照蒼震丕  
承拜工部侍郎充樞密直學士兼知開封府事邦畿之  
間實方國之都會輦轂之下蓋獄市之兼容簿書期會  
之煩豪右侵并之弊公擊斷無滯浩穰以清俄抗封章

求解劇任即拜禮部侍郎再入翰林為學士前席虛佇  
清宴延登動靜諮詢周旋獻納且以禁林書詔之填委  
周廬宿直之勤勞屢面至尊辭以目疾除兵部侍郎知  
上黨郡事水深土厚足以養痾尚德興廉於焉靜理神  
明之化期月有聞秩滿徵還以本官充翰林侍讀學士  
數月兼祕書監金華侍講允謂深嚴祕府刊書是資鴻  
博論思慎密體溫室之不言學問淹通蘊河東之默識  
為儒林之領袖實朝右之羽儀然而民望攸歸公議斯

逼果躋鼎席同秉國鈞景德元年七月以公為吏部侍郎叅知政事踰月以本官平章事監修國史與今中書上谷公並命焉是月冬天驕寇遘變輿薄伐公以美疢之故不果扈從旦夕治療幸其有瘳追及澶淵見於行在是時皇上講和戎之利繼好以息民修弭兵之盟天旋而飲至公運籌漢帷早啓興邦之言偃節靈臺親逢下武之運同心一德叶贊於欽明夙興夜寐彌綸於職業無何腠理生疾賜告家居中人國醫冠蓋相望公以

為三事之任四海具瞻鎮撫外夷將明萬務陟降帝右  
非可以貪榮寅亮天工非可以曠職遂陳手疏願解樞  
軸上特降優詔不允其請申命近臣俾之諭旨丁寧備  
至靡容遜讓公感極以泣疾亦稍平入覲穆清面陳至  
懇上敦獎尤異毗倚彌深而公常膳載加自公匪懈有  
犯無隱方宣補袞之勤外強中乾忽起逝川之歎梁木  
斯壞何哲人之云亡同體忽虧實元后之深痛嗚呼享  
年六十有八上特為制服發哀羣臣奉慰追錄嗣子及



於諸孫乃至給使之微咸蒙甄獎之澤又特命皇城使  
愛州刺史衛公紹欽監護葬事太常考行謚曰文簡發  
引之日有司具鹵簿鼓吹大鴻臚持節護喪即以今年  
正月辛酉歸葬于鄭州管城縣馬亭鄉廬村之南原從  
先太師之塋禮也公積階至金紫策勲上柱國三進爵  
為公加真食之封益功臣之號人爵之盛曷以加焉娶  
東陽駱氏累封陳國夫人出於華宗作合君子享是偕  
老宜其永年二子長曰世長太子中舍裕蠱馳稱道光

於濟美次曰慶長大理寺丞聞詩稟訓志聳於象賢三  
女長適故刑部員外郎李象次適進士張扶先公而逝  
次適江州德化簿劉宗誨職方郎中蒙叟之子也二孫  
從善從古俱任將作監主簿雖在羈州之年竝敦孝謹  
之行有後之慶豈誣也哉公通介有常謙卑不伐接下  
和易未嘗輕於匹夫與人久要以是稱為長者居處儉  
約不喪於素風中外踐更克守於清節善談名理聽者  
忘疲多識典故酌之不竭屢掌書命潤色之美居多亟

預疇咨獻替之勤斯至洎入叅大政荐陟中樞年耆益  
明人望唯允展四體以率職曾無越思奉三接以矢暮  
於焉盡瘁居位之日尚淺致君之略未伸遽茲歸全蓋  
有遺恨性嗜墳史手不釋卷晚年寫書百卷字皆方寸  
躬自讎對以脩觀覽常所著述遺札頗多諸孤等孜孜  
編綴為三十卷垂世不朽其在茲乎某早奉音徽屢陪  
談宴矧又紫垣掌誥聯顏范之官曹黃閭拜塵熟丙魏  
之風采且令嗣之勤請迫玄寢之有期願志幽局豈敢

牢讓銘曰

畢氏之先肇基洪源大名啓胄後裔實蕃公之乃祖始  
居鴈門吏於州縣不違丘樊顯允太師貽謀濟美有志  
四方考終百里公之既孤不學斯恥徙居園田鄭多君  
子杖策從賦登名太常隨牒應聘嘉言孔彰乃督河漕  
乃佩郡章歲滿增秩寔彼周行乃佐戚藩乃司雅誥醞  
藉風規周旋輔導雍容內庭渙汗大號諫官長人善政  
云報翼翼京邑巍巍東朝珥筆垂紳是為元僚宥密樞

衡深嚴禁署侍從論思再至迭處上黨之治民惟去思  
宣室之對帝乃疇咨入踐岩廊冠于宰司民具爾瞻百  
工允釐永年未登二豎興殄人之云亡天不憖遺恩極  
臨喪禮優贈襚帝念良臣永懷遺懿野蒼茫兮風颭颭  
馬蕭蕭兮旄悠悠背都城兮遵廣陌遡新阡兮歸故丘  
俯咸洛之大道兮介溱洧之通流嗚呼賢相之墓兮在  
此隴樹拱兮春復秋

大宋贈侍中追封廢王墓誌銘

奉勅撰

昔者周建戚藩重之以執牖之數漢封宗室申之以軟  
血之盟所以隆敦叙之恩崇糾合之義其有炳靈帝胄  
擢秀天枝屬寶厯之肇興顧徽音之早謝友于致美極  
太上之孔懷典章錫命播策書於悠久親親之德厚莫  
重焉王諱光贊順祖惠元皇帝惠明皇后桑氏曾王父  
母也翼祖簡恭皇帝簡穆皇后劉氏王父母也宣祖昭  
武皇帝昭憲皇后杜氏考妣也太祖英武聖文神德皇  
帝太宗神功聖德文武皇帝王之兄也曩者木德下衰

三靈改卜赤符啓運百姓與能歷數有歸謳歌允屬太祖皇帝握滎河之祕紀應耀魄之元符受諸夏之樂推為生民之司牧帝出于震龍飛在天奄宅中區允升大寶卜世三十與成周而比隆執玉萬國無防風之後至於是右賢左戚崇德報功咨詢稽古之言講求固本之術裂茅土以利建著丹書鐵契之文分寶玉以展親增維城磐石之固若乃嗟棣華之早隕慨桐葉之前聞軫同氣之深情舉漏泉之茂典於是建隆三年詔皇第五

弟贈侍中追封夔王仍賜今名厚飾終而峻追命也黃  
門監之品秩貂冠蟬綬諸侯王之名數金璽盤綬泥書  
出於右掖蜜印賁于九原蓋白水中興演也昨全齊之  
壤黃武建國策也啓長沙之封所以光照大猷發揮遺  
懿憲章前代肇天命於維新光寵公族致民德以歸厚  
丕顯淳耀莫之與京今上紹休繼明奉先追遠念本枝  
之盛永惟叔父之親顧佳城之制當用真王之禮啟新  
阡於畢陌祔玄寢於橋山相善地於牛眠得吉卜於龜



食寔窳之事所以即安鹵簿之儀悉從備物中人庀徒而歲役鴻臚持節以護喪先遠戒期哀榮舉集即以景德三年十月二十八日歸葬於河南府鞏縣南訾鄉鄧封村順也夫志陵谷之變者必傳信之辭形金石之刻者乃不朽之事下臣奉詔猥當紀述伏紙流汗媿不能文銘曰

皇矣帝胄發源靈長錫羨蕃衍德厚流光嗚呼不淑喪我賢王炎靈勃興高穹睿命玄壤封崇綠綈哀贈修睦

興仁簡編輝映帝曰叔父永懷茂親歲月增逝輝光日  
新改卜真宅于洛之濱風蕭條兮木葉脫野蒼茫兮班  
劍列驚燧啟兮靜而安薤歌發兮淒以咽國有史兮揚  
德音墮有銘兮志微烈垂萬祀兮千齡飛英聲兮昭晰

大宋故光祿大夫檢校太保左衛上將軍兼御

史大夫上柱國信國公食邑一千戶食實封

二百戶追封周王謚悼獻墓誌銘

奉勅  
撰

昔者駢旄之誓示天下以懷柔麟趾之詩明公族之信

厚陶唐之聖華封陳三者之祝太姒之賢大雅垂百斯  
之頌其有分暉帝胄毓德皇闈至性出於自然積慶由  
乎錫羨而乃叅駕鶴之侶同子晉之上賓標稱象之能  
歎蒼舒之早世惻宸襟於丹極謁休裕於青編嗚呼哀  
哉見之於周王矣王諱玄祐字慶長今上之第二子也  
以至道元年十一月二十四日生於東宮昊穹眷懷承  
華多慶石墻銀榜表天地長男之祥甲觀畫堂處世嫡  
皇孫之貴而王稟溫恭之德挺岐嶷之姿亦既免懷未

嘗好弄雖在稚齒宛如成人雅尚文史尤嗜筆札辯壽  
街之牘精識造微對長安之日神機絕俗八歲制授光  
祿大夫檢校太保左衛上將軍兼御史大夫上柱國信  
國公食邑一千戶食實封二百戶元子比士雖禮經之  
舊章半楚以封實太上之謙德維城之美克茂於本枝  
齒胄之儀未遑於外傳俄邁陰陽之沴遽成膏肓之疹  
日躋厥德與三善之彌彰天奪之年何九齡之弗祐以  
咸平六年四月二十三日薨於宮中年始九歲釁生鶴

禁悲纏椒掖震宮虛位感極天慈都人罷市痛深行路  
特詔廢朝五日追封周王有司奏諡曰悼獻蓋夏王鍾  
愛玄宗繇是以賜名臨淮早亡世祖不遑於進爵方策  
所紀布於前聞哀榮之數斯為極致先以其年五月十  
有三日權窆于開封府開封縣汴陽鄉之禪惠僧舍即  
以景德三年十月二十八日脩鹵簿鼓吹陪葬于永熙  
陵遵吉卜而安壤樹也自初窆及歸葬並詔供脩庫副  
使入內內侍副都知張景宗監護焉惟王玉振金相竹

苞松茂荷茲百祿體自九重而明允篤誠英敏聰悟起居祖習了無童心被服造次必於儒者奉兩宮之歡愛左右咸宜躬三朝之候問夙夜匪懈及勝衣趨拜胙土啓封並建戚藩立愛以固邦本外總宿衛經武以重親賢德望彌宣徽猷益盛仁孝愛士將從四人之遊博習親師式佇三雍之對無何庭蘭方茂奄至驚秋隙駟靡停莫聞留景吳客致問知玉體之不康太史觀文駭前星之失色斯蓋天人之合應靈真之降祥暫表瑞於皇

家復收神於太素望思不已軫漢后之深慈封樹克終  
從橋山之真宅嗚呼佳城一閉夜臺千古拱木合抱悵  
歲月之推移深谷為陵庶文字之傳信臣恭膺明詔獲  
當撰述在昔苴茅錫社常奉行於命書今茲卜兆開阡  
又勒銘於玄寢濡毫感愴誠無媿辭銘曰

皇圖三葉兮邦家會昌錫祚蕃衍兮源發靈長猗蘭積  
慶兮黃離降祥帝錫純嘏兮挺生賢王在傳不勤兮英  
姿聿彰為善最樂兮嘉言載揚天既難忱兮命亦靡常

秀而不實兮今也即亡愁雲繁兮歲將暮清霜凝兮天  
向曙森騎吹兮前引儼芻靈兮先路祔宅兆兮文園愴  
風煙兮輦樹唯青簡兮翠珉垂令名兮終古

述一首

殤子述

予授室之明年出領縉雲郡下車十月而生一子既三  
月執其左手歎而名之曰雲堂雲堂生七月予被召歸闕  
前一月太夫人舉族先歸建安吳興之別墅比墨書至



予亦間道歸拜墳墓雲堂頗能識其父迎門而笑躍  
而就予抱焉家居僅五旬慮稽留詔書遂單車即路凡  
再見拙魄而至京師氣慄慄以變衰歲崢嶸而將晚明  
年春迎版輿自三吳汎九江浮淮汴汴就養於輦轂而  
雲堂始蹠蹕能行旦暮嬉戲於太夫人之膝下爰笑爰  
語甚是慰祖母之心涉秋召病命醫視之先是瘍生於  
頰善療者必令外決使毒氣不留藏中醫市井徒也利  
其有瘳亟飲以藥不數日而愈未浹旬病腹痛便利又

呼醫視之醫急以藥止又數日下血復召醫但謾言將愈利於受直訖五日有加而無瘳即召他醫醫言疾深矣殆不可為也既而疳氣上攻口中齟齬皆創落兩齒手足掉舉目眩轉而死噫生於己亥十月之己未死於辛丑八月之乙丑凡六百六十七日其賦命也何天促之如是哉因念萬物之內最靈者人父子之道斯惟天性過猶不及適情之所鍾有而歸無亦理之可遣然高堂奪抱孫之慶哀門纏遺體之悲蓋累積自躬而禍延

於嗣夫子所謂苗而不秀者是之謂乎若其月角對聳  
山庭衍乍眉目踈秀方口大頤必興吾門終能成器其  
在襁褓挺然不羣初生纔滿月方呱呱而泣家人取書  
冊展向之即熟視其文字喜且笑若能識焉未嘗遺矢  
溺於席褥上雖夜寒亦展轉而起家有奴產子者亦數  
歲頗無賴雖羣萃中了不怖懼東西跳梁歌吟無度每  
遠見是子必惶懼號泣若無所容家人潛抱令近之必  
大呼殞絕不知其所以然也初疾愈東室中北壁有畫

佛像每過其門必引身入焉視其畫而笑若相對語者  
乃喜甚儻家人拒之必號哭偃蹇如是日三四十往以  
至於疾甚性不好弄不嗜味不妄言笑太夫人常言吾  
閱孩孺多矣未有此兒之卓異也豈吾宗之薄祐無復  
大其門閭耶而病夫之不夭將遂擠於溝壑耶因念嘗  
讀金仙子之書了知大雄氏之旨識六塵之妄相見諸  
行之無常聚沫非可撮摩浮雲條然變滅輪迴起於愛  
必斷必除煩惱歸於空何著一切虛幻萬化紛綸

又安能觸類增悲。緬懷舐犢之愛。積毀成疾。自貽喪明之戚哉。予出於儒門。沈迷俗諦。猶或慕聖人之達節。希上士之忘情。誠知其無可奈何。聊以自道耳。服名教者。得無罪我乎。

行狀 二首

故翰林侍讀學士正奉大夫尚書兵部侍郎兼  
祕書監上柱國江陵郡開國侯食邑一千三  
百戶食實封三百戶賜紫金魚袋贈兵部尚

書楊公行狀

曾祖式不仕

祖部

父澄累贈禮部侍郎

建州浦城縣乾封鄉長樂里楊徽之字仲

猷年八十

公之先華陰人永嘉之亂流寓江表占籍上饒郡凡十餘世唐上元中劉展叛吳會騷然公之六代祖遂舉

族避地於建安之吳興因為著姓自高曾以來用財力  
雄於州里唐季俶擾乃祖鳩合義旅幾乎千人保境亢  
宗一邑是賴受署義軍指揮使烈考博通文史為鄉黨  
所稱王氏之據有閩隅也物色異人寤寐豪傑首畫奇  
策請見牙門忠懿王奇之即日解褐置之幕府未幾賜  
五品服拜本縣令絃歌之化流于桑梓蕃衍之祥鍾於  
燕翼公即其次子也始在童丱卓然不羣結髮從師刻  
苦為學羣從兄弟率以豪俠相尚馳騁狗馬被服輕煖

使酒難近結客報仇而公杜門端居偃仰圖籍躬親布  
素之行深為宗黨所服邑人江文蔚善賦江為能詩公  
皆延於客館之中伸以師事之禮曾未期歲與之齊名  
潯陽廬山學會甚盛四方髦俊輻輳其間公既終二親  
之喪即與從父弟叅躡屨擔簦不遠千里亦既至止名  
聲藹然先生鉅儒咸共歎伏凡再罹寒暑其業大成參  
適有懷土之心公即遣歸省視墳墓時李氏建國奄有  
淮淝贄幣不通邊關甚急公不居一國有志四方思樹



勲於中原恥懷安於故土杖策徑去潛伏間行聿來上都憩于逆旅適及秋賦假籍河南首冠薦書時譽愈出時翰林學士竇公儀樞密直學士王公朴皆負公望為一代龍門公徧投以文竇公倒屣相迎王公置書為謝待以奇士名動一時明年禮部侍郎劉公溫叟實掌文衡擢於殊等同時登第者凡十有六人周世宗申命近臣再加考覆唯公及李覃何臧趙鄰幾得預其選是年秋授祕書省校書郎集賢校理遷著作郎升朝為右拾

遺皇朝革命以周室舊臣不宜在侍從之列出監唐州  
方城商稅太祖多遣近臣廉訪謠俗使者即公之故舊  
公因言應天順人海內寧一所宜崇儒術以厚民風使  
還具白其語太祖怒以其訕上左遷鳳翔天興令未幾  
又移嘉州峨嵋令公文學之外長於吟詠歷宰二邑周  
旋數載凡遊賞宴集良辰美景必有彫章麗句傳誦人  
口或刊於琬琰或被于箎弦岐隴巴蜀之間蓋金相而  
玉振矣開寶初復為著作佐郎散民鹽掌倉穀者四五

年僂俛從事曾無愠色未幾知全州屬太宗御極拜左  
拾遺歸朝遷右補闕及受代歸闕見於內朝太宗顧左  
右曰朕在藩邸嘗聞其能詩因畫索公生平所著公搜  
於篋笥凡得數百篇悉以奏御且獻詩稱謝其斷章曰  
十年流落今何幸叨遇皇王問姓名太宗覽之甚喜和  
以賜之自是黃屋間宴翠華遊豫宸章煥發天言下布  
宣示近臣之外必以別本賜公瓊蘊瑤編充盈篋笥未  
幾拜侍御史歷庫部員外郎賜金紫受詔與諸公編文

苑英華一千卷皆前賢之詞賦詩筆分別部類揀求菁  
英先朝以公專精風騷特命編詩為二百卷公孜孜採  
掇矻矻服勤非風雅之言未嘗取也遷刑部兵部二郎  
中同知京朝官考課端拱初拜左諫議大夫明年知許  
州公久奉外朝不樂吏役許昌地接京輔當四通五達  
之郊郵傳交馳冠蓋相望公勵精為治盡公無私餞勞  
之勤日不暇給纔二歲受代西歸太宗召升殿慰勞數  
四即以本官判史館事中謝日上顧侍臣曰楊某儒雅

之士置於館殿正得其宜矣數日加史館修撰仍判館  
事會張洎以翰林學士判史館即以公判集賢院時劉  
昌言掌機務張洎在翰林昌言固恩寵洎希進用有以  
公常評議二人者語於昌言昌言又以語洎因共誣公  
以飛語中傷近臣聞於上上惡之不復問狀即以公檢  
校右散騎常侍充山南東道節度行軍司馬未行改鎮  
安軍行軍司馬數月以今上出領京邑慎擇府僚驛召  
公拜左諫議大夫與今兵部侍郎畢公士安同授開封

府判官明年肇建承華分置衆職以公兼太子左庶子判官如故進位給事中上即位拜工部侍郎充樞密直學士咸平初轉禮部侍郎學士如故俄以衰疾求解近職拜兵部侍郎兼祕書監數月上優獎耆德圖任舊人且欲親近老成講論經義遂詔置翰林侍讀侍講學士以公為翰林侍讀學士祕書監如故與戶部侍郎夏侯公嶠國子祭酒邢公昂工部郎中呂公文仲竝命焉公侍講金華分直麟閣執經待問前席疇咨上從容言天

下事甚衆借筋之畫莫非沃心更僕之談或至移晷然  
奏橐多削溫樹不言其慎密也如此俄以足疾請告太  
醫診視中使勞問上自取名藥封以賜之適會郊禋不  
及扈從上特命加錫如侍祠之例鑾輿北幸力疾辭於  
苑中涕泗沾襟備述忠懇上謂之曰卿勉進醫藥當不  
日相見及駐蹕大名特降手詔存問公每上表疏皆自  
為之三年正月二十二日車駕還都上特遣中貴人慰  
諭即日疾遂革二十三日以不起聞上軫悼者久之詔

贈兵部尚書降內司賓至其第以錢五十萬絹五百疋  
賜其家仍命中使監護喪事緣葬所須並從官給以其  
子壻太常丞宋臯直集賢院外孫宋綬為太常寺太祝  
纔十歲姪孫偃集皆同學究出身獎舊臣而示優典也  
公先娶王氏生宋氏女後娶王氏封太原郡君公天性  
純懿無有矯飾履行端謹未嘗放佚以儉約自律奉養  
甚薄以名教為務顛沛不違接士以謙卑檢身以清白  
好談名理多識典故自唐朝已來士族人物風流雅俗



悉能記之疊疊可聽素好吟詠遂臻其極每對客論詩  
終日不倦此所以垂名亦幾乎成癖也崇奉釋典酷信  
因果每五鼓即起盥漱誦金剛經如是者三十年未嘗  
暫廢所誦亦十數萬過矣公無男子亦不養子姓為嗣  
琴書素業並以付外孫焉公自結髮筮仕影纓登朝中  
外存更夷險一致精力極思能成其名勞形畱神用躋  
乎壽夫子所謂善人吾不得而見之矣又云未見好學  
者也公之謂與其餘十年在官徐防無過一裘不易晏

金史卷一百一十一  
卷十一  
子能貧周旋累朝名節保於終始遭遇明主存歿極於  
哀榮亦人倫之羽儀士類之標準也紀述之際有直筆  
在焉聊叙遺芬以咨史氏謹狀

故太中大夫行給事中上柱國臨汾郡開國侯  
食邑一千二百戶賜紫金魚袋柴公行狀

曾祖丕任廬州別駕

祖肩贈太子右贊善大夫

父自牧任尚書兵部員外郎累贈禮

部侍郎

曹州濟陰縣沛郡鄉崇儒里柴成務字寶

臣年七十一

公之先平陽人由高曾已來占籍濟陰因而土著遂為  
著姓先大夫以文行首出一上登進士科歷佐使府終  
於郎署公爰在童幼發言成章總角之年出就外傳橫  
經學問迥如宿習秉筆屬文動偕作者甫及冠歲志業  
大成尚復藏器待伸養勇俟鬪誓得當世儒學宗匠為

門下生乾德中禮部員外郎知制誥王公祐受詔典禮  
部公即踊躍從賦王公覽其文而奇之擢冠多士朝論  
翕然有得人之美解褐峽州軍事推官秩滿為曹單觀  
察府中從事所知論薦改大理寺丞監潭州茶場筦擢  
之利頗致增羨幹蠱之譽揚于王庭擢授太常丞峽路  
轉運副使賜五品服遷監察御史知果州轉殿中知蘇  
州滿歲移充兩浙轉運使改戶部員外郎直史館賜服  
金紫除本曹郎中充三司戶部判官太宗皇帝講求化

源疇咨典故且以列卿之職實惟古官各有攸司所掌  
甚重爰自唐室以臺閣相高迄至于今日為散地由郎  
署而授者例同左遷濬發德音丕變頽俗乃選尚書諸  
曹正郎有才望者凡十人次補諸寺少卿監仍著令自  
今非曾歷少列不得擬給舍諫議公首預茲選拜光祿  
少卿辰韓之墟稱藩海外屬有恩詔慎求使材命公為  
高麗國信使公雍容儒雅博聞強記衣冠之國文物盛  
焉舉措話言是法是倣皇華之美至今稱之復命為京

東水陸轉運使召入拜司封郎中知制誥遷左諫議大夫出知河中府得脫戶八百家附於版籍今上踐祚拜給事中知梓州歸朝受詔同修太宗實錄十月而畢勞賜策勲寵數優渥未幾以本官知揚州入判尚書刑部小吏干犯怒而笞之詣闕訴冤朝官問狀公以為扶一胥而被劾何面目復據堂決事耶即上章解職以本官奉朝請至是考終於正寢遺奏以六歲孤兒為言上憫之特授太常寺奉禮郎命賦以祿俾終喪紀公始娶趙

氏故宗正少卿齊之女也後娶張氏今夫人李氏封贊  
皇縣君故水部員外郎峒之女也實有令德洽于宗姻  
公三娶良家晚有見息行年六十有六始得今奉禮焉  
公好學多能博物稽古始在貢部為時聞人奮藻屬詞  
流輦推服或有所述作必傳寫都下終以才望入司訓  
誥發揮帝命頗為稱職而襟懷夷坦無有城府音容和  
粹煦如陽春善與人交久彌篤也好治家事勤不置也  
善談名理口無擇言廣聚墳史手不釋卷雅性奉道徧

閱金簡玉笈之文平生多病深窮惡石青囊之術恬淡  
以養性蔓衍以窮年其風規醞藉閱閱深厚亦足以為  
儒林丈人矣記事之職良史在焉謹書世家以告冊府  
謹狀

武夷新集卷十一



欽定四庫全書

武夷新集卷十二

宋 楊億 撰

策問 十首

咸平四年四月試賢良方正科策二道

奉勅撰

朕聞古先哲王疆治天下親附萬民必先務農然乃足  
食故堯命四岳謹於授時禹別九州先於平土以地著  
為本故建步立畝克正經界之規以生齒為限故受田  
歸田式優筋力之禮繇是穡人狎野品物嘉生悉闢汗

萊且無曠土雖有水旱不為凶年然後禮讓興行風俗  
歸厚勸功樂事靡遷其心既庶而富爰服於教此聖王  
域民之要道也自周行井田是為王制秦改阡陌乃成  
霸業漢抑末而敦本衣食滋殖魏屯田而積穀軍國富  
饒中代已還人散久矣我國家屢下寬大之詔深懲游  
惰之民闕市之征舟車皆算恐其騁於末游天災流行  
田租盡免慮其去於南畝廣行勸誘之術俾臻仁壽之  
域而廩庾之積未至陳陳相因流亡之人猶復稍稍而

出郡國振業之不暇豪強倍稱而益滋未能小康乃至  
重困矧又西北寇孽作梗二邊飛輓供須靡有虛日千  
金之費尚煩於經度九年之儲何致於紅腐今欲復成  
周之法即表覈素定恐至擾人遵商君之術即貧富不  
均無以復古用李愷之平糴即頭會箕歛出於無名行  
夷吾之寓令即賦車藉馬適增重擾舉趙過代田之策  
即民服先疇既難變業專壽昌常平之議即市有二價  
罔或樂輸但賞罰以粟即贖罪失於不經賣官致於虛

授若耕戰備寇即隴畝非可使卒塞垣難以安民子大夫明識經邦強學待問多識前訓博極羣書宜考歷代之是非以定當今之用捨強兵富國何者當行嘉謀嘉猷虛懷以佇

又

問古者鄉老獻賢能之書登于天府樂正論造士之秀揚于王庭或以事以言以才以德先選於州里然服於官常其後下三適之詔聿明賞典乘一封之傳令與計

偕或以戶口為差或以年齒為限經學章奏用別於文  
儒力田孝廉益增於科目或但取世胄或專引孤平以  
王戎之清通猶有門調戶選之謗以宣父之仁聖尚聞  
以貌以言之失自隋設進士唐氏遵行山東士人以不  
踐為恥朝廷卿相率由此而陞笑窮經白首之徒專篆  
刻雕蟲之巧婉媚綺錯既事於詞華敦樸遜讓罔求於  
行實流蕩忘返浸染成風故玄宗臨朝深歎於薄俗楊  
綰建議願復於明經雖不果行甚為嘉論然而沿襲已

久改易為難儻舉選復行於州閭即人物之評未能折衷科級專求於經術即章句之學非可適時各舉所知乃有比周之黨陳牒自薦寧獲貞退之賢必取乎文質俱全更傷於求備但委乎郡國搜訪亦慮於遺才至如限之以年即顏回子奇豈須強仕計之以口即八龍三虎何必異鄉但取乎文華即組繡鞶帨徒為富艷唯務於學業即腐爛屑齒彌益迂踈國家官倍夏商地廣唐漢吏員萬數皆須得人百里一賢將何充選備陳歷代

之略以副仄席之心用期酌中朕將親覽

咸平四年八月試賢良方正策一道

奉勅  
撰

皇帝若曰朕祇若元符為人司牧昧旦丕顯虔恭寅畏  
懼德之弗類慮政之未孚蓋念昔者周命百官皆歲王  
闕漢設三道用求直言誕舉舊章思聞讜議茲子大夫  
逢時奮庸有犯無隱之秋也夫五材並陳去兵未可八  
政具舉足食是先今國家北扞林胡西禦黨項歲遣介  
士以防盛秋弛邊備即越軼之是虞窮兵鋒又徵發之

為擾堅壁翫寇固役車之未休繼好息民復文告之靡  
及故蒸庶不得安堵弓矢無由戴橐至如人獲四鬴之  
餘始免艱食國有九年之蓄乃為太平今曠土尚多游  
手未復勸課之道非不至賦斂之數無所加萬鍾之藏  
蔑聞於都鄙一穀不熟遂抵於流亡今欲倍算舟車且  
驅之未盡歸而貿遷斯壅給復租稅又惠之未及富而  
經費不充復常平之倉即市井之價或有二修平土之  
法即經界之制未可行自非時和而年豐不免困窮而



轉徙又如總領衆職莫急於求賢審官申嚴百刑莫先  
於明罰飭法今疆宇遼闊吏員衆多必得其材然付以  
任故文王之德在於能官人東漢之隆本於責吏事今  
但委有司之考課亦第閥閱之未精只遣使者之察廉  
又飾厨傳而為患漢武之欲除吏田蚡非可擅權德宗  
之擇縣令柳渾譏其失體遵荀勗省官之議即員難減  
者實多體薛宣換縣之規即才適用者殊少雖循名  
責實之斯切而政平訟息之未臻至若金科玉條竹書

丹筆以禁多辟所期無刑其屬三千蓋防於踰矩斷獄  
四百用冀於勝殘雖然慕陶唐之畫冠且免而無恥體  
漢初之疎網又姦乃益生必待臯陶作士師法寧可廢  
豈須定國為廷尉民乃不冤俟論報即久繫是虞但責  
成即舞文斯衆苟四目之罔及乃一人之向隅或罹非  
辜足傷和氣子大夫策慮幅臆智略輻湊兵者凶器必  
可使歸馬放牛食為民天必能致家給人足攷建官之  
意當俾百工之允釐稽立辟之由期措五刑而不用並

揣歷代之略兼陳方今之宜揚摧而言朕當親覽

咸平五年九月試武舉人策一道

奉旨撰試  
武舉人王

關

皇帝若曰夫五材並用誰能去兵七德孔修於焉右武  
故軒轅受符於玄女所以興涿鹿之征呂望釣璜於磻  
溪所以著金匱之法歷代之簡編咸脩先民之軌迹具  
存孫吳著書首標奇正之說衛霍為將但問方略何如  
然述兵法者實祖於斯人稱天幸者亦聞於前史得失

安取是非焉從至如魏武之善用兵亦以新書從事孔明之能勝敵乃云節制之師葛亮斯有準繩何一時應變之寡術孟德出於胸臆何諸將違律者喪軍豈師古有膠柱之嫌臨機有脫兔之急沿襲不同於前代弛張固在於隨時當舉要而劇談庶聞義而斯服今國家尚勤戎略式厲師貞所以威制羗夷保障生聚而黨項狂寇猶假息於朝晡葷獰殘妖頗肆毒於邊鄙調民轉餉遣戍防秋內費資儲外勤征役未能梟取虜首懸於橐

街縛致胡鶚獻于清廟茲朝廷旰食之為念謀夫高枕  
之未遑子大夫識擒縱之方練攻取之策五餌係虜賈  
誼之言可徵三章議邊晁錯之謀斯在敦詩閱禮何以  
得文武之全才籍馬賦車何以致兵農之一混約齎深  
入何以登瀚海而勒燕然保塞折衝何以按榆谿而清  
薊北伐蠻夷者豈煩中國形勢如何得地利者不如人  
和勝負安取參以前志舉爾所知講求便宜敷陳指要  
庶披確論用達善經

試草澤柳察策二道

問王者專山澤之征實惟周制縣官設鹽鐵之禁蓋自漢朝所以牢籠貨財抑奪豪右從來久矣何莫由斯國家奄有寰區外制邊徼用度斯廣經費實繁東南之邦茗荈攸產池海之利鹹鹺是資筦推之法載嚴律令之文具備設憲網而雖密投罪罟者彌多蓋衣食之所由縱水火而必蹈今欲盡弛其禁即九年之計不充習以為常即五刑之用未措子大夫深達治體必切事情幸

揣當今之宜別陳經久之略

又

問國家並建庶官分領衆職守宰之任風化出焉故大  
邑庇身子產徵於引喻惟良共理漢宣發於歎嗟今土  
宇混同郡邑紛布版圖羨溢吏員衆多守土之臣多輟  
於臺閣字人之長咸調於銓衡皆程其器能校其閥閱  
因清閒之宴必數納以言虛已疇咨曾旰食而忘倦懸  
爵懋賞俟期月之有成雖慎柬惟勤而頌聲未洽或驅

難之無狀或治庖之不能或貪墨以敗官或嚴殘而剥  
下愷悌之化斯鬱循良之稱鮮聞至於分遣察廉飾尉  
傳者率邀善譽專考科第拘殿最者多失鉅賢詔公卿  
各舉所知或稱匪其人恩移於下俾牧守自署其屬即  
愛不吾叛用必以私益知審官之難矧復長人之寄子  
大夫博探載籍深究政經當述選賢任能之方且明興  
化致治之本條對所問揚摧而言必考古以驗今庶可  
行而不悖



景德二年三月試草澤劉牧策二道

奉聖  
旨撰

問化成之道儒術為先故大學之興存於周禮博士之  
設始於秦官歷代相沿舊章咸在國家盛膠庠之制崇  
俊造之科鏤版以廣聖言祭菜以嚴祀典傳經請益必  
選碩儒講肄胄筵咸稽古訓而公卿之子弟鮮隸籍於  
成均州里之俊髦率登名於鄉老豈勸誘之未至將沿  
襲之或殊何以復杏壇槐市之規遵小成大成之制弦  
歌不輟誕揚洙泗之風生徒寔多克追唐漢之盛願聞

嘉話用洽永圖

又

問古者井田之設兵農混焉居常力耕不離於畎畝有事調發爰執於干戈蓋三代之舊章歷戰國而無改施及秦漢沿襲漸殊京師建南北之軍郡國有材官騎士內增七校外置樓船自是已來不能復古而況五材並用誰能去兵天下雖安未可忘戰今國家勤修武備式遏外虞所以保障黎元震耀威德將何以追司馬六軍

之制遵提封百萬之規免飛芻輓粟之勞成家給人足  
之美寓令於疆畔其術如何講事於菑苗厥旨安在願  
聞婉畫以闡大猷

試草澤策一道

景德二年  
三月二日

問四民並設蓋務穡之尤先九序惟歌實豐財而為急  
國家富有區夏勤恤黎元訓兵以備不虞建官以熙庶  
績乃至宗廟賓客之費名田奉邑之資歲計所叢國用  
尤廣雖復頒行恩詔敦勸農功奉順天時聿修稼政罷

不急之務去冗食之兵裁減賜予之規斥棄奇巧之玩  
敦本節用斯為至矣而九年之蓄物力未完一穀不登  
流亡乃出將何以致污萊盡闢游惰悉歸足衣食而知  
禮文值凶荒而無菜色又何以致太倉之粟陳陳相因  
上林之錢往往而是然後家給人足頌聲浹於連甍國  
富兵強天威震乎殊俗子大夫博通載籍練達政經必  
有嘉謀悉以條對

景德三年九月試賢良方正能直言極諫科策

一道奉勅撰

皇帝若曰我國家奄宅中土勤恤庶邦念前代求賢之  
勞思昔王好問之裕濬發明詔詳延俊民樂聞讜言用  
裨至化茲子大夫韞積待價藏器俟時射隼有功逆鱗  
無忌之際也方今邊候徹警戒戎索載清與民息肩爰戢  
不祥之器為國生事深戒守方之臣蓋已卧鼓滅烽賣  
劍買犢下勸農之詔勗游惰以反耕置常平之倉謹豐  
凶而平糴勸課之道斯至脩豫之術具頒而流庸未盡

歸汙萊未盡闢陳陳之粟尚鬱京坻之謠蚩蚩之氓競  
逐錐刀之末倚市門者鄙於刺繡為馬醫者至於擊鍾  
使寒耕熱耘之民有粗衣菲食之歎厚生敦本何以盡  
驅於力田既富而教何以一變而至道若夫慎重名器  
先儒之格訓辯論官材為邦之令典著位峻於堂陞効  
用適於輪轅固亦周爰咨諏宴見敷納徵保任於公舉  
觀試可於吏能黜陟幽明稽有虞之彛制綜核名實遵  
漢宣之故事其有尤異之課即申以增秩之文若乃非

常之才必待以不次之位我有好爵茲用縻賢國無敗  
官於焉致治而庶尹卿士郡邑牧宰暨於黃綬一命青  
綸半通雖有司殿最之申嚴外臺刺舉之詳察尚或貪  
墨以獲戾罷輒而廢職徇公者傷於苛刻賈譽者病於  
脂韋致有嚚訟升聞煩輶車之紫劾具獄來上待丹筆  
之科條但採於風謠或察廉之失實專取於課第亦茂  
異之見遺將何以致械撲之詠興蒲盧之政治授方任  
能之道著亮采惠疇之業昭巍巍大朝有官人之盛濟

濟多士無彼其之譏子大夫強學多聞稽古博識究歷  
代之損益明當今之利病所宜窮斯民雅俗之弊極談  
恥格之方考庶官治亂之由深陳用人之術遲聞嘉話  
以闡大猷當悉乃心勿有所隱

表狀一十首

知處州謝到任表

臣某言臣昨奉勅差知處州軍州事已於今月三日赴  
本任訖遠辭螭陛權剖使符百城之任既優五綵之榮



斯極臣某中謝臣早自孤平獲逢開泰徒以雕蟲之伎  
遂塵汗簡之司皇帝陛下夤奉宗祧旁求俊乂謂臣處  
於羣萃竊畫餅之名知臣恥於進趨挺素絲之節度越  
倫輩超踐掖垣復誤賜於選掄獲同司於筆削家徒四  
壁貧方甚於臨邛字賞千金書未懸於秦市特推恩於  
陋巷俾將命於列藩既克就於國書又驟加於勲籍未  
出瀛洲之署尚參文石之班蓋以臣早奉庭闈久棲輦  
轂離邦寢遠懷土滋深烏鳥之情實巢南之是切芻蕘

之懇須伏閣以自陳封章纔黷於冕旒俞詔已頒於蓬  
草幸一麾之甚便復再䟽以請行陛下察以寸心恕其  
九死許扶攜於老幼令密過於鄉閭况浙右與區緡雲  
善地閭閻蕃庶土壤膏腴聲教所覃俗知禮讓耕桑甚  
廣民少惰游今歲雖罹旱暵之災尚多溉灌之利人無  
菜色畝有餘糧屬隣郡之不登故穀糴之微貴提封之  
內安堵如常前春已來不至乏絕一境偶無於疲瘵九  
重望減於焦勞臣謹當恭守詔條恪居官次袴襦報政

豈晷月之敢期水蘖檢身固生平之所履儻渝素守是  
速靈誅臣又念朝辭日得面聖顏親承睿旨以俯隣於  
桑梓又獲奉於甘旨推從欲之仁廣聽卑之造特許終  
於考秩且未議於替移即臣舉族知歸殺身莫報況丘  
園甚近雞犬相聞鄉里親姻或諧於聚首弟妹婚嫁免  
至於失時上以慰慈母之心次以了私門之事而臣齒  
髮方盛駑蹇未衰抱槩懷鉛終預諸儒之末摩頂至踵  
須酬萬乘之知冒昧上言隕越無措臣無任云云

謝賜歷日表

臣某言今月日本州進奏院遞到宣頭一道賜臣咸平二年乾元具注歷一卷者夏正肇建堯歷爰頒克授人時不迷帝力臣中謝伏以皇帝陛下端拱穆清茂育羣品德合天地信及豚魚象魏懸書定一王之法制靈臺治厯究三統之指歸濬發宸襟載稽古訓將欲納民軌物致俗胥庭俾雩祀靡愆無水旱之作沴農夫既正免耕稼之失時顧茲遐僻之邦亦荷頒宣之寵七月流火

見司厯之無差五星連珠與太初而相應臣謬膺朝寄  
獲布郡條發函徒切於凌兢測管豈知於疏密謹當虔  
遵時令恪舉官常彌堅夙夜之誠上答照臨之惠臣無  
任云云

賀再熟稻表

臣某言據本州麗水等縣狀申今年人戶所種早稻自  
秋初刈後為雨水調適元根再發青苗結實成熟共得  
兩收已具州司別狀聞奏者多稼並熟所謂有年嘉穀

再登斯為上瑞臣某中謝臣聞昔者后稷之功既著一  
稔二米顯其祥成周之道方隆異畝同穎昭其應貢交  
趾者曾聞於再熟取甫田者爰及於十千蓋以玄德升  
聞至誠昭格天地訢合百嘉由是而生風雨弗迷三時  
以之無害允鍾上聖克協靈符竊以山越之鄉多乏膏  
腴之產火耕水耨獲地利以甚微食稻與魚習土風而  
惟舊去歲因罹於小歉今春遂至於薦飢力穡雖勤餽  
糧殆絕參以五種之利救其二哺之艱俯及秋成僅無

菜色皇帝陛下乃眷東顧陰隲下民臨遣使臣循行縣  
道慮賦輿之不集盡賜田租念飢饉之可哀大發倉粟  
城邑聚人之地為設淖糜山川血食之神必祈膏澤道  
路之寇數者貸其枯木之斃溝隍之填委者推以掩骼  
之仁明詔誕敷和氣斯應如臣所領之郡近接海隅一  
千里之封陲三萬家之生聚自蠶事載飭厥篚之獲頗  
多及麥秋俯臨兩岐之謠斯洽菽粟流行黍稷豐穰絕  
無螟螣之災率有鍾釜之蓄矧早稻既獲陳根尚存大

雨時行土膏脈起芄芄發秀薿薿垂芒同枯楊之再生  
異靡草之先死結實棲畝歛穢盈車至於晚田又收數  
倍遺秉滯穗既寡婦之是資千倉萬箱顧老農而何幸  
臣忝膺郡寄獲覩年豐親逢五穀之祥同賴一人之慶  
周原膺膺猶詠曾孫之詩堯民熙熙敢迷上帝之力休  
徵斯在純錫昭然伏望宣付史官書之簡策干冒宸扆  
彌切兢惶

賀冊尊號表



臣某言今月二十四日得進奏院狀報前月七日百官  
于乾元殿奉冊尊號者嚴祀式陳鴻名肇建含靈悅豫  
盛禮便蕃臣某中謝臣聞山嶽配天亦擅崇高之美坤  
元載物爰彰博厚之稱垂世作程所以強名于四大稽  
古建號盖用比德于九皇在衆美之所歸雖上聖而奚  
謙伏以崇文廣武聖明仁孝皇帝陛下誕膺眷命光宅  
中區執左契以御民張四維而化俗齋居決事聿彰欽  
恤之仁旰食臨朝用示躬親之旨羣生咸遂庶績其凝

體唐堯之文思光被四表恢商湯之武烈底定萬方化  
馳若神高陽之稟聖德臨下有赫文王之服大明兼漢  
祖之寬仁挺重華之篤孝總帝皇之能事掩天地之全  
功惠澤及于昆蟲湛露淪于骨髓六龍出震瞻之者豈  
可階升百谷朝宗就之者或思蠡酌于是邦君庶尹國  
老諸生橐街蕃酋比屋黔庶共薦厖鴻之稱仰酬煦嫗  
之仁叩閭闔之九重集緇玄之萬計至于懇倒始奉允俞  
有司虔舉于舊章率土願聞于大號乃以仲冬至日合

祭圓丘禮行于郊百神以之述職飲至于寢羣后由是  
在庭端拱穆清祇受典冊祥光休氣充塞于寰瀛歡謠  
頌聲傳聞于行路足以昭祖宗之謨訓聳四裔之威懷  
人神之望允諧祝史之辭無媿五讓而受謙光之德已  
隆九名聿彰覆燾之功彌廣臣側聞國慶限守詔條魏  
闕存心徒結雲天之戀虞庭率舞莫陪飛走之餘抃蹈  
之誠實萬常品臣無任歡呼抃蹈激切屏營之至

謝加勲表

臣某言今月二十五日進奏院遞到官告一通勅牒一道蒙恩加上騎都尉餘如故仍放朝謝者在宥之恩方覃於率土冊勲之典俄及於具僚祇荷寵靈伏增悚惕臣某中謝伏以唐制勲官十有二等克遵班爵之序備存律令之文所以褒賞忠勞甄明品秩不稱其職羊胃之謗乃興或曠厥官鵜翼之譏斯起如臣者謬塵祿位淺著聲猷束帶立朝已媿諍臣之任一麾出守猥慙循吏之稱屬燭柴薦鬯之辰無除地給薪之効爰因大慶

亦被鴻私諫垣未削於姓名勲籍驟遷於等級天威所及蓋咫尺之不違官箴有常但顛沛而於是彌勤職守用報寵光仰荷天慈臣無任云云

謝賜歷日表

臣某言今月十四日本州進奏院遞到宣頭一道賜臣咸平三年乾元具注歷一卷者歷象之設克謹于民時正朔所頒俾知于天道臣其中謝竊以少昊獲鳳鳥之瑞因以建官陶虞有蓂莢之祥由之紀歷所以定分至

啓閉之候辨躔次弦望之差作事厚生制民命而斯在  
歸餘舉正察時變以可知崇文廣武聖明仁孝皇帝陛  
下欽奉丕圖祇膺眷命聿遵前典不廢舊章疇人之職  
既修天吏之功靡忒清臺肇建校諸家之否臧大衍克  
成正千載之譌謬豈期僻陋亦荷頒宣敢不虔奉王正  
率循時令土膏纔起便候于農祥玉燭既和永躋于壽  
域粗識閏餘之數免貽贅循之譏仰戴宸慈臣無任兢  
惶激切之至

謝賜衣表

臣某言今月十六日翰林藝學却俊至伏蒙聖慈賜臣  
勅書一道紫綺純綿旋襴一領并賜屯駐本城諸軍員  
僚初冬衣襖者解衣之賜猥及于下臣挾纊之仁更均  
于列校先生郡邸喜動轅門臣某中謝伏以崇文廣武  
聖明仁孝皇帝陛下誕膺元符恭臨大寶惠必先于逮  
下志惟在于愛人鳥獸氄毛甫及嚴凝之候衣裳在笥  
爰推賜予之恩在渙汗之所沾雖容光而必照如臣者

任叨符竹地僻甌吳奉漢詔之六條方深祇畏分齊官  
之三服忽荷頒宣纂組極于纖華純綿加于麗密璽書  
下降竊窺雲漢之文驛騎來臨更重皇華之命但曳婁  
而增湯寶被服以難勝矧于戎行亦膺天寵干城雖久  
曾無汗馬之勞守土何功獨懼濡鵜之刺仰瞻宸極唯  
誓靡捐臣與軍校等無任感天荷聖歡呼蹈舞激切屏營  
之至

武夷新集卷十二